



PAUL FLORA: AUF IN DEN KAMPF – CARTOONS, EDIZIUN DTV 1972

# Mercur lascha salidar

DA MARIA CADRUVI

■ **Jau ma regord anc bain. L'emprima giada ch'jau hai udi che Mercur saja il Dieu roman dals laders e manzasers sun jau stada in zichel irritada. Tge urden è quai en il reginavel dals Dieus ch'i dat perfin in Dieu per ils laders e manzasers?** Cler ch'jau aveva udi che Mercur saja medemamain il Dieu dals commerziants, dals viagiaturs e dals communitgaders e – ch'el saja il currier dals Dieus. Quest schurnalist celestial m'ha cumenzà ad interessar ed jau sun vegnida a savair da tuttas sorts. Ses chalzers han alas. El è spert e speditiv. Ed el sa persvader cun inschign e malizia. El è abel da s'adattar enorm svelt a novas situaziuns ed el è in campiun da cumbinar chaussas. L'effect ed il profit – e betg il senn – è quai che quinta per el.

Cun questas characteristics è Mercur in cumpogn sco fatg per esser er il Dieu da quels e quellas che procuran per fake news. Derasar mesas vardads è insatge che è sa manifesta e sa sviluppa en il far e patratgar dals umans dapi l'entschatta enfin oz. «Dar da crair» è la devisa. Cain

ha dà da crair al Segner ch'el na saja betg il pertgirader da ses frar. Peder ha dà da crair trais giadas ch'el n'enconuschia betg quest Jesus da Nazaret ch'era vegnì manà tar il primsacerdot. Politichers han dà e dattan da crair a lur subdits ch'il mund vegnia meglier per els cun construir mirs. Igl è enconuscent che dar da crair ha conjunctura auta cunzunt en trais situaziuns: avant elecziuns, durant ina guerra e suentar la chatscha.

Far chatscha sin il pli grond diamant dal mund vulevan pli probabel era laders. Quest diamant è vegnì spedi avant passa 110 onns da l'Africa dal sid en l'Engalterra. Ils responsabels per il transport han fittà ina nav da vapor plain policists. A bord sa chattava però sulettamain ina copia da la pedra preziosa – quai che gnanca il chapitani sa-veva. Il vair diamant era vegnì tramess en ina modesta chista cun la posta regulara recumandada. Mercur ha laschà salidar! Ch'i dettia el u betg, el ha procurà e procura anc oz per bleras infurmaziuns alternativas, per irritaziuns, trumpadas e cugliunadas – ma era per grond divertiment.

L'autura è anteriura redactura dad RTR